

珂

雪

叅

前

集

珂雪堂前集卷之五

公安鳬隱袁中道著

門人試可程仕進校

詩

感懷詩五十八首

署中無事誦讀之暇默然枯坐四壁光
瑩偶有所思提筆書之念故感今醉語
嚙言參差不倫不忍棄寘命僕從壁上
錄出共得詩若干首

朝見日東生暮見日西沒日沒樹影藏日出樹影發移牀隨樹影披衣任散髮荇帶走縈迴紫苔波滑滑人心若清涼炎曦似冷月

其二

天意忽欲雨諸山起翠靄一峰綠油油忽出青藍外倏然晝昏黑九域起甘霖花溪曲曲流都赴石橋會石渠流不迭激激發大籟宿雨藏密葉欲往不能蓋

其三

沿溪兔目繁綠柳枝垂鏡雨過出曦陽蟬聲更
熾盛別有急音聲切割如刀刃脩然成穩眠金
磬出予定

其四

望風風不來望雨雨不至惟餘疾雷聲不測皇
天意垂柳入電光金支變青翠疾若阿欵國一
現出明媚何必對金樽佳茗作荷氣不用逐陳
編嘿坐有清致枕簟易餘涼黼黼成佳睡

其五

少時有雄氣落落凌千秋何以酬知己腹下雙
具鉤時兮不我與大笑入皇州長兄官禁苑中
兄宰吳丘小弟雖無官往來長者遊燕中多豪
貴白馬紫貂裘君卿喉舌利子雲筆札優十日
索不得高卧酒家樓一言不相合大罵龍額侯
長嘯拂衣去飄泊任滄洲

其六

步出居庸關水石響笙竽北風震土木吹石走
路衢蹀躞上谷馬調笑雲中姝囊中何所有親

筆注陰符馬上何所有腰帶五石弧鴈門太守
賢琵琶爲客娛大醉斫案起一笑捋其鬚振衣
恒山頂拭眼望匈奴惟見沙浩浩羣山向海趨
夜過虎風口馬踏萬松株我有安邊策譚笑靖
封狐上書金商門傍人笑我迂

其七

北登恒山頂車蓋雲茫茫中心忽愁思思我兄
中郎去去信馬首幾日窮薊疆潞河沙浩浩衛
水流湯湯清淵飲美酒彭城待秋光黃河迅竹

箭忽若鳥飛翔含淚拜漂母流落歎韓王五日
芙蓉水送我到維揚不見雷塘路不聞瓊花香
舊橋二十四塵土撲衣裳金焦望海闊梁溪酌
泉涼錦纜青雀舫忽已到金閶追尋聽雨樂清
譚殊未央

其八

清譚未云幾郎舍厭高眠凌雲振羽翮吾志欲
遊僊聞道天子鄣真人下九天道引八百人同
日凌紫煙是事有與無我欲訪幽玄泛舟西子

湖澹水豔紅蓮螺嵐幻諸峰玲瓏發巧妍振衣
嚴陵灘曲折愛清漣水中石齒齒山上草芊芊
朝度芙蓉嶺嶺與天相連空山無人處花落流
涓涓白月上衣裳畫沙坐水邊訪之無要領一
笑九華顛潯陽十二派震怒響山川瀟湘急雨
裏白浪打行船復歸舊樓隱掃梧弄筆研

其九

輕帆止江涯家山在煙霧振衣入郭門城池已
非故朱門湧清波長堤亘衢路手植門前柳虧

蔽成高樹道逢小兒子長揖向阿父入門眷屬
驚閣犬狺狺怒昔時攜手人大半先朝露感舊
有餘悲嘆逝傷情慄

其十

山村松樹裏欲建三層樓上層以靜息焚香學
薰修中層貯書籍松風鳴颼颼右手持淨名左
手持莊周下層貯妓樂冥酒召冶遊四角散名
香中央發清謳聞歌心已醉欲去轄先投房中
有小妓其名喚莫愁七盤能妙舞百轉弄珠喉

平時不見客，驕貴坐上頭。今日樂莫樂，請出彈箜篌。

十一

昔時舊酒人，傾尊定酒帥。一吸百餘盞，酒徒皆羅拜。是夜月如晝，大堤共于邁。狂歌若奔雷，長江吼滂湃。居民不得眠，親黨皆嗔怪。精悍在面顏，零落舊壇會。回首憶當年，咋指以自戒。

十二

阿香皎如月，阿雪溫如玉。相文校書郎，七弦彈

黃鵠芙蓉詫腹五水僊寫瘡六金閨憐慧卿鳳
凰橋上哭章華歌者王梅花清芬馥回首看朱
樓恍然猶在目金石尚且摧何況粉黛速多半
王鈎斜青楓根下宿發願誓空王清淨以自勗
稽首告天妹我情成土木今生則已矣來生莫
相逐

十三

一自入情緣棘蓬忽身墮愁令不耐生恨令不
顧禍竦身出重圍天蘿挂衣破幸然除熱惱清

淨已心諾既向棘中出不回棘裏卧南山有危
峰瀑泉如雷過開窻聽水聲掃地焚香坐

十四

偶景青蔥下嵯岫弄峭清條聞懸雷響自爲勝
九成世樂豈不樂不如清冷雲孫孃亦自好不
能留許生若華富文藻晞也無復情如何馮敬
通不知出塵纓終日房櫳裏耳聽布穀鳴

十五

雲戶蔽岫寢樂危對桂榮秣芝浮霜淨剪松沉

雪清憐肌蓄骨髓實氣愛精神腐鵝看梁錦土
石視侯卿哀哉夸毗子膏火日縱橫生滅攪夢
寐途長空苦辛

十六

回數八襖先兄弟長安陌阿大官詞林銀榜侍
經席白面漆髭鬚三驥馬赫奕中郎列虎闥簪
袍映列栢予時爲諸生時時分米赤伯也有新
居是舊江陵宅前有抱甕亭後齋名蘇白堦前
種花竹森森無遺隙春日弄微暄簷下坐歡適

兄云家門盛伯仲繼通藉獨子時不遇萬里鍛
羽翮予云兄無言萬事怕嘖嘖卽此是盛時此
盛恐難益但恐後視今今翻爲奇迹此言猶未
寒伯也歸寂寞蒲桃林不改零落碎圭璧欲哭
近婦人感歎坐終夕

十七

友于有至情傷哉王景玄阿謙一以逝拊心祇
自憐昔時寶三光割嗜以祈年今也惟速化不
望世間延感此淚如雨零落彌歲年會合亦有

期定志在青蓮

十八

鳳神緣戢羽麝走爲遺香如何英靈士耿耿露
寒鉉激鍛多大韻搏黍見顛狂世路雖嶮巖藏
身亦乖方山北與山南白石可爲糧流連塵網
中哀哉罹禍殃回首五松橋譚易析毫芒惟有
聰明泉流水常湯湯發言潛寶契一室閉蒙莊
書存人已往撫卷有餘傷

十九

龍章與鳳質叔夜何清遠神明忌太遒流俗惡
狂嬾坦非隣險地險者疾其坦馴卽非龍性龍
性豈求免揆景奏鳴琴一曲消憤懣以此七尺
身頓令綱羅管胡不從公和藏身何太簡楊氏
欲見招翩然不復返衣冠雖已潛常在黃馬坂

二十

古人重結交意氣身相許抽心有至情鼎鑊不
足語曹敞收吳章脂習哭文舉郭亮墓李固胡
騰埋竇武豈不畏死生攘臂赴砧俎交情重丘

山忍令無處所何人無緩急夜半難扣戶扣戶
猶且難安能挑乳虎慷慨有餘哀擲杯以中柱

二十一

夜夢大峨嶺積雪天際頭爽氣入心脾清冷透
衣裘山下有高士圭壁凜清修輕財若簞籜重
誼等山丘名理羅二氏技藝綜九流晤對萬山
中清言可消憂我欲從之往惜哉無扁舟安得
生羽翼凌風以遠遊

二十二

朝亦對青山暮亦對青山青山不知名常在窻
櫺間我欲登此山見之不得攀洗塵一日雨忽
似美人鬟謝公調馬路惆悵感心顏

二十三

朝出古北口暮歸漁陽道馳馬走平原箭如餓
鴟叫習習耳後風醉餘發長嘯呼韓過不先琵琶
餘歌笑壯志久已銷百城從所好

二十四

愚者願爲知知者願爲愚知者多計算一息幾

百馳古來飲酒賢陸沉心中悲心中何所悲了
了颺神思柰此了了何溷之以酒卮酒多寧不
病幸忘了了知李云嗜非甘樂取其昏迷分別
不留行渾沌近無爲此是似現量猶可遣歲時
現量况于真不樂復何之

二十五

栗里有醉石平泉有醒石醉石令人醉是非總
消釋醒石令人醒恩怨森劒戟是非既消釋宇
宙何不適劒戟可傷人迴刃亦自刺所以栗里

予一笑易其簀平泉無主人魂兮歸不得醉石
可爲珍醒石宜棄擲

二十六

月額雨相續人皆愁雨苦我有千卷書不愁
日雨雨氣冷楹軒開窻玩今古親與古人譚
鉛代麾塵有時扶皮膚昭昭見肺腑文錦勝天
孫快舌類鸚鵡只此十笏地無日不歌舞珍重
謝天公無妨作霖雨

二十七

墨子行十笈姬公朝百篇采摛閑暇日牛衣記
誦年古人急典籍窮困且益堅安坐蠹衣食何
不親韋編妍皮褻癡骨張口坐雲煙弘景亦有
言才鬼勝頑僊此理通出世毋爲惜丹鉛卯金
能博學上帝遣人觀

二十八

六經爲梁肉子史爲鼓吹百家及稗官海錯羅
珍奇譬若延大賓庖廚萃膏腴飽後江瑤柱亦
能佐酒卮煌煌銀印文妙理挾玄微可以開心

眼華梵非所知持衣在得領索食重療饑如何
郊天鼓必用麒麟皮腐儒八十宗穿鑿亦何爲
鑿井失美源有若天南箕

二十九

貴耳賤其目千古同一揆親見楊子雲名邇位
尤卑覆甕視太玄抵掌笑其愚張率假沈約虞
訥頗稱奇虬之清思賦託名乃見知文章有定
價世眼迷真僞馬駢及牛頭嘈嘈以相師世名
何足取留之待來茲千秋無贗本惟餘碧落碑

三十

山禽味以短水禽味以長箕畢殊嗜好朱紫異
文章千古才人習任情以雌黃好之則爲羽惡
之則成瘡子才重沈約不爲彥升臧魏收慕任
昉抵掌笑沈郎俗態胡爲爾三斗貯爛腸心如
諸葛秤那能輕低昂大海控八河一味少參商

三十一

修詞有慧脉妙處在生動非法非無法寫照阿
堵重小夫嗇才情託法以自控大音無細響嗤

之爲豪縱徐熙花寫生新意出時衆黃筌殆其
能出格以爲諷

三十二

人多悲秋氣我獨愛秋聲洞庭一夜脫蕭瑟有
餘清梧葉飄空堦隨風走且鳴草間啼絡緯蟋
蟀響四楹大化遞遷流日月徂且征萬卉漸零
落刻露見山岑豔豔繁華色枯槁不復侵譬如
學道者披剝見天根

三十三

日暮望遙山絳霞散林野如雪如素練晃耀亂
山赭白者移過樹乃知是人也暮色蒼然至牛
羊皆來下萬物盡有歸擾擾何爲者

三十四

少小讀詩書志欲取青紫命也可如何七上七
廻否棄置如蓬麻誰憐一段綺紉絲出藕腸剝
膚洞石髓過眼一蚊虻參差逮暮齒膏腴傳世
間資潤後來士拾取牙後慧翩翩見雀起自憐
射雕兒控弦無虛矢何爲獨流落刺頭入故紙

三十五

黃金高築臺樂毅爲燕客三星聚虛危管仲走
卽墨當其濩落時所憂在朝夕一旦乘風雲時
主望顏色何代無奇才欲飛無羽翮治世拙雄
圖流落在草澤不解作駢語終身墮荆棘流汗
負鹽車困窮理亦劇一見解紵衣長鳴淚雙滴

三十六

終軍棄其襦郭丹投其符昇僊橋上客携賦入
神都升沉指顧間弩矢耀鄉閭惜哉瑰奇士年

年泣窮途末世網目密不采布衣愚低頭營疏
箋霜雪點頭顙英銳宜蚤用老矣難馳驅

三千七

千古相如才千古相如遇當其不偶時親着犢
鼻袴一朝見明主視草承天顧更有黃衣翁催
作大人賦鬼神亦憐才才高鬼神慕餘芳襲後
來寘之高士數慢世未必然文采爲士附

三十八

夷羊旣在牧飛鴻滿路岐割鼻以飭口息主能

無危洛陽銅雀聲久矣絕鳴期秣馬金閨歌志
士有餘悲子陽識桃亡知伯悟多遺大者蔽泰
山小者如列眉顧瞻周道衰費子亦何愚豈憂
河水濁不如清淚滋沸波欲止潮徒爲衆鳥嗤

三十九

貧窮難久處憔悴苦心神親友既疎遠妻兒或
反唇中郎著九惟自歎星值貧應璩遭霖雨得
粟復虞薪機榆已見謀一飽復無辰尺帛不得
貸易水哭蘇秦人生固有命天地豈不仁志士

百鍊剛固窮以爲珍口腹安葵藿烹飪非所營
落毛以蔽體羅綺非所親但令心無累聊以適
此生

四十

陳蕃所憇家已定玄錄期華歆夜聞語懸記北
陵時鍾山一丘土萬日前已推人生數有定何
必苦奔馳飲水亦有司貪求復奚爲所以物外
人淡然少思惟自心徒冰炭定命豈可移勸君
息妄想毋爲路鬼嗤

四十一

孔雀愛珠毛終爲羅網嬰靈龜白銀骨亦以災
其身陵雪戒長塗滅蹟必無因鴻鐘旣在御豈
能消聲塵人苦名不高名高益苦辛世亂求退
難羅網航航陳南山有隱地子孫可避秦已矣
復何言退藏以爲珍

四十二

昔我先邵公高誼凌千春皎懷若白雪直節似
朱繩四世承素業曰惟儉與仁路中悍鬼者驕

奢墮家聲密飯行絳道率以自圯傾乃知安恬
素實爲保世珍吾家有夏甫亂世解藏身土室
誦貝葉千秋爲典刑

四十三

夢入梅花嶺行至萬松處松聲如奔濤喬木葉
虧蔽重湖得日色晃耀蕩遠素好鳥一聲來清
寐倏非故憶之不能忘塵鞅催上路三徑倏已
荒欲往非朝暮

四十四

一別簣簪谷荒蕪心常切小阮八行來園林轉
茂密入門石容古垂籐不落格行至竹香徑新
笋成高節微風一以至萬竿響琴瑟來禽與批
杷森森皆結實含桃多布子采之得一石黃棋
壓樹繁甘美殊可啜八月木穉開香風十里徹
臘月梅花放冷冷一天雪衆卉不勝書大抵皆
茁發止是無主人寂寞誰賞適覽此令人歡南
歸興勃勃如何走塵沙不還衆香國

四十五

家有百畝田膏腴可以耕家有十畝園竹樹何
蕭森老農以爲友老圃以爲隣二十七種菜庾
郎昏度辰肉食由來鄙葵蔬養性靈道旁有秘
藥名載于僊經金鹽與玉豉可以致長生

四十六

初日照燕市燦燦若緋桃劇藕縈天絲羅綺不
勝驕銅駝集冶子金馬羅輿豪濯龍門外車日
暮恣遊遨趙李經過樂歌舞無昏朝一歲復一
歲韶華易爲銷人語暫時歇鬼語復嘈嘈鬼語

復何道九陌生人勞九陌生人勞土盡槐根高

四十七

天門平坦開綺羅朝市盈白馬桃花綬拱揖似
羣真尚冠羅戚里履道聚公卿堂堂槐與棘軒
軒入承明紫貂映霜雪呵殿似雷聲不知輿上
誰見之心膽驚燕市多颶風常吹陌上塵一層
塵已去一層塵又生

四十八

盛衰不可常閱世惟山丘豈待華表鶴歸來慘

離憂譬如日及花朝夕零陌頭四世青廂史五
代赤泉侯一朝時運改蕭瑟如凜秋臣念春漿
泣鴟爲腐鼠愁富貴若常在樂應屬爽鳩

四十九

九衢喧漸靜日暮動歌鐘冠帶各相索冥酒會
羣公水陸陳異品美醞清若空子夜驥馬啖澹
脆間醇釀妙舞清歌輟閒房坐從容翩翩周小
史有如日在東和顏善調笑清令體柔豐如何
青桂樹寂寞伴楊雄獨餘書帶草冉冉隨輕風

五十

時平才士貴仕路渺雲霄乘時策高足毋爲沉
下僚有如指日輪無蹟自成高有若乘風御不
往自迢遙但知問升沉誰覺素顏凋君看龍尾
路磚石砌堅牢朝綦成窪跡石泐磚有銷今朝
耀黻綬三綵桃花嬌設撥與沈榆轉盼不相饒
宦途亦有涯念此使人焦

五十一

朝爲魏其客暮爲武安賓昨日長平吏今朝拜

冠軍時來手可熱鶴蓋晝成陰紫輦塞門巷意
氣何繽紛一朝勢零落雀羅冷戶庭綺席厚蒼
苔蹊路草青青輕薄逐暄寒蟬翼未爲輕徒令
旁觀者蒼狗笑人情

五十二

西北有高樓望見連雲宅黃棘北煥間寘第無
遺隙金盞與王盞門前羅畫戟五婦呈奇峰三
侯羅怪石鬱鬱鴈翅檜森森珠子栢亭臺無復
改惟見主人易今日金吾館明朝侍中室所以

築夫言致令郭令泣寘鐵爲門關路鬼笑額額

五十三

中夜起望氣異氣何氤氲黃者爲金膏白者爲
玉英惟有銅錢氣蠹蠹如青雲錢氣如青雲此
語毋乃真君看青銅子行樂四時春陌上飛紫
燕矯首凌蒼旻

五十四

燕趙多冶女初日照芙蓉粉黛失顏色羅綺怯
柔豐粧成度新曲鶯燕娛芳叢冶遊誰家子騎

馬若飛龍日暮上高堂琵琶出簾櫳左手興奴
好右手曹綱工今日樂云樂但醉莫匆匆君看
桃李花暫盛終隨風郊外白楊路十里馬鬣封
牧兒坐其上狐兔穴其中枯骨當時在小語面
發紅

五十五

吳國有館娃楚國有章華不聞香水溪惟見金
釐花綺羅氣銷盡皆爲空王家赤華藏貝葉青
豆貯袈裟乃知色爲空塵土悟豪奢

五十六

天弓架日箭遙遙射四時人命非金石傷哉露
易晞阮藉與陶潛世累瀟然離此情難擺落迷
之以酒卮積金東澗士選客屬大虛流珠雖在
龜對月常歔歔世人如犬羊時至任烹膈豈有
慧心人能忘生死悲麥化宜以灰痛飲亦何爲

五十七

人生貴不朽不朽亦非名寂寞身後響枯骨詎
有情嗟彼啖名客生時苦怵營前有杜武庫沉

碑入漢津後有顏尚書鏤石寄高深七尺爲塵
土贊毀寧我親別有不朽方欲言難語卿火布
怪曹子蝦鬚駭滕生

五十八

何必蒸靈芝何必潤澧泉何必晞朝陽何必綏
五弦一心苟不生萬化無虧全不捉疑索蛇毒
怖豁心田不求網吹滿終日樂陶然我有養生
術無身亦無年扣之不卽應露柱語便便

檀州書院有龍爪槐枝葉婆娑蔭覆數畝

詩以紀之

幕天茵地錦屠蘇龍種居然萬卉殊聊借藤蘿
藏火甲欲搏星斗作明珠冰霜屯結寒池館鱗
鬣開張入畫圖莫怪婆婆須拄杖中郎醉後要
人扶

用蔡中郎醉龍事

阻水

白浪粘天蛟龍怒激水濺城向東注不待麗王
彈箜篌如此風波將安去莫言留滞在漁陽驛
州也不是家鄉且向龍爪槐下飲受用清秋一

夜涼

凌總戎招飲北極樓

兵戈散盡古漁陽有客相延看大荒胡地諸山
如拜舞漢關列岫自飛翔閑持杯酒觀雲變斜
倚欄杆嗅雨香留得庾樓風景在他年來此醉
秋光

京師雨大注會長石太史以詩來因屬和
等閒塵土變清流烏爪僊人笑不休履道宅中
惟貯水善和坊裏好行舟高車何處來驚坐曲

室差宜對莫愁恒雨恒暘公等事漂城陷邑我
忘憂

別中郎南歸時偶值嫂及庶嫂之變轎車
雙發不勝酸楚離別之情可知因賦詩十
首

患難催人別重尋舊薜蘿綺琴傷鳳靡寶瑟怨
鸞吡夜月寒燕市秋風撼潞河臨岐悲骨肉此
地客魂多

其二

束髮爲廉吏饑寒不自存那能甘豹隱頗亦仗
魚軒蒿里歌相續春曹席未溫同來不共返南
國費招魂

其三

秋輝冷射堂蒲社草荒涼笛裏纔思舊閨中又
悼亡白波喧建業紅樹染潯陽未病先儲藥生
平解老莊

其四

牛衣君自念蛇膽我難尋萬里王程苦兩河秋

氣深成煙生夜浦巢影露寒林花草雷塘路凋
殘舊日心

其五

少別與長別應無不散筵生來薰白業家世種
青蓮了却鴛鴦夢閑尋鷗鷺緣也知憐稚子不
要效先賢

其六

憂來不下淚笑裏帶傷神霜葉如羈客秋天似
去人休心憑宦拙省事任家貧柳浪湖邊水排

愁看逝鱗

其七

漸與道人似歸來梅鶴清竹風秋院淨水月夜
湖明掃地焚香坐栽花種柳行世緣雖寂寞羸
得會無生

其八

一夕皆星散令予何所依邊風如夜哭塞草重
寒威老定連牀約貧催異國飛必懲蘇氏事白
首要同歸

其九

掃塵一夜雨割葉滿天霜鴈也思離北儂胡不
憶鄉騷人歸夢澤鼓吏滯漁陽去住都難決徐
徐葺草堂

其十

家有文中子真宜老醉鄉啣杯捐世法蒔藥辦
仙糧筮仕緣焦革開山祀杜康尊兄知勝韻憑
世笑顛狂

送張雲影還山

還山棲隱去靜坐任雲封長瓜仙人氣休糧道士容捲簾千畝雪當戶一株松莫道無姬侍雙鬟雨後峰

其二

大事止如此端居巘岫中心應同水色耳只貯松風軟草譚邊綠閒花定裏紅由來稱淨土癖潔不妨空

送方子公附中郎舟南歸

懶持襦刺向侯門南北相依念舊恩囊裏無錢

詩卷在老來多病酒腸存一天白月澄山市幾
朶黃花豔水村我已不能隨鴈陣賴君清奕伴
晨昏

贈別朱上愚銓部予告南還

心澹官憑熱神閒應不忙百函驚佐史半字識
盧郎秋水迎僊佩寒雲貯客裝九流需藻鑑隨
鴈別瀟湘

其二

少年專赤縣無處不攀輪西子湖邊雨神僊枕

畔春黑頭台輔貴白屋滯才伸應向叢臺過還
思用趙人

公初爲邯鄲令後令錢塘

其三

豈惟張楚國經世借名流犀利銷奇氣深沉見
老謀朗吟千戍月大醉兩河秋天上神僊吏山
川總勝遊

中秋漁陽道中

悔別丹谿與碧莎黃沙拂面鬢先皤閒隨獵馬
穿荒磧怕見寒鴉綴瘦柯明月總圓無賞處邊

風乍起柰秋何簑簑谷裏芬香夜清露團團湛
碧波

其二

生平那解淚沾巾顧影飄零萬里身乍別鵲鴿
如隔歲欲親僮僕也無人心孤不忍驚鴻陣骨
冷何堪伴桂輪前日綠華芳草地而今枯槁作
灰塵

其三

八特羊羹走峻坡照人白髮是溪河醒來鷹隼

盤雲上怒後驂騑激電過修嶺西橫無漢樹短
牆北去有胡戈拜州欲住猶難住敢望家山舊
薜蘿

其四

紛紛黃葉下城池疲馬重裘走路岐沙岍總因
霖雨塌原莎不受勁風吹如何芬馥中秋夜翻
似蕭條暮歲時三十八年塵土命祇將明月照
奔馳

壽寒令公

期爲八月十七日

生懸長矢射胡塵屢代承天一柱身欲識朝多
深厚福但看邊有老成人時無害馬銷戎隙口
不譚兵擾塞民舊日關門親種柳于今搖曳漾
河津

其二

鼓角無喧歷歲年醉翁華髮映池蓮新分桐酒
延賓從盡採鐃歌入管弦鴈帶朱霞穿畫戟桂
團明月照清筵衡門幕府何分別元老功成卽
是僊

其三

是日紅雲繞帝州
藥珠天上賀長秋
先持絳節朝宸闕
後閃朱旗見徹侯
醑酒普沾鷄鹿塞
彤弓新出鳳凰樓
懸知社稷金甌固
黃髮干城足老謀

其四

不隨蒲柳艷韶光
石幹銅柯傲雪霜
周室耆年推尚父
漢家僊吏重張良
燈花欲奪秋輝色
戟葉時聞桂子香
天下安危需壽者
如今休話午

橋莊

卽事

鎮日支頤望遠嵐
歲稔重鎖似春蠶
花前嬾學陶公醉
夢裏欣逢釋子譚
草淺牛羊迷塞北
煙圍竹樹憶江南
故園橘柚垂垂耀
不得親分一味甘

其二

易水飄零淚染貂
那堪紫塞遇青腰
北來刀尺無消息
南去帆檣久寂寥
覓醉幾曾儲竹葉
試

書何處有芭蕉只宜脫却儒冠去閒逐胡兒看
射鵰

其三

日穿松樹射閒身戟外青山看漸真定裏鳴禽
如喚客秋來遊蟻也拋人陶詩細讀愁何在莊
語重箋意更新最喜塞垣消息到黃花一帶虜
無塵

月

明月涼如水樹影湛湛動遮天露霧深入面風

稜重步楹時獨行老眼倦讀誦閒却好清言只
是無人共不如擁襪眠細作青山夢

落葉

商風忽以至遮天蔽城郭只此數株樹能禁幾
迴落葉去獨空枝誰與伴寂寞轉盼失青林參
差見朱閣一歲等閑休飛花尚如昨葉落不離
地我行眇天末感歎步空堦不住旋竇絡隨風
時一行騰地如小雀

夜讀

雪簾陳麗字銀燭照秋毫
珠點生紅燄沉箋沸
綠膏葉聲如過雨
茶響似奔濤只作山中看
何須更鬱陶

靜坐

擲却殘書去
端居萬慮忘
邊風無晝夜
塞月帶冰霜
鐘斷猶餘韻
爐寒不受香
如何當此夕
啼鳥也潛藏

九月塞上已雪

昨夜尚餘星
隨風舞不停
當窻山已白
拂戶樹

猶青隱几寒披襖烹茶預洗甌縱晴無處去撥
火玩殘經

其二

亂舞迷天地窺簾入幌斜中槐猶隱葉著菊尚
凝花候冷先傳塞夢寒不到家欲知邊地苦親
自到龍沙

其三

欲蔽飛狐道橫遮飲馬泉楊花如昨日稷雪已
殘年老怯衝風看愁思帶酒眠寒威應不減聚

墨似胡天

聞丘長孺武場被落志感

事事每如此濃想倏成夢盛年已不還常作窮
途慟劉郎有書來九箭九迴中射策乃剩技文
章翻無用豈有倚馬才不能壓餘衆瑰奇輕殼
率母乃太豪縱近事不可知白黑殊瞢瞢馬肆
不收龍鷄羣常落鳳命也可如何造物工調弄
李白謫僊人低頭丐薄俸燈下聞落第我身亦
爲重家累日漸多所憂在朝饔子貧我亦遭富

貴幾時共老來怯奔波吾志甘抱甕世途亦有
涯萬事覺前途展轉不能眠窻月松枝動

閒步

且莫辭游行無風塞上稀鳥爭松子落霜減藥
苗肥入洞苔侵屐攀巘棘冒衣日斜容易墜峰
頂尚輝輝

懷中郎

黑雲釀雪亂山高夢裏明明見節旄孤客廣陵
淒夜月一帆湓浦濺秋濤歸來應喜存三徑悼

逝將無長二毛萬里遼陽稀客至尺書空自憶
江臯

其二

偶逐塵沙憶濯纓蒲騷若見眼先明魚遊鳥逝
如歸興水落山空似宦情墮地幾曾經歲別涉
江動是半年程腐儒筆研成何事歸去山中學
耦耕

夜酌

不須座客滿酒至自傾壺堦荇如堪拾窻松似

可圖傾醪歸碧石投棗入紅爐吒吒燈花語家
書到也無

至日辰起感懷

沙上濃霜雪未消亂鴉鳴後轉無聊黃簾綠幕
終何事紅藥青緹又一朝風裏傳來殘鼓角夢
中失去舊漁樵故園履襪何時寄目斷南雲信
轉遙

祈年姪以書來訊兼寄近作殊可觀且云
家園花木益茂因喜而有述弭寄之不更

作報章也

挑燈看遠牘喜逐八行生筆札存風氣文章漸
老成賞心成一醉訊使到三更小阮非凡品窮
途憫步兵

其二

非復少王郎多年識豫章好懲驚粉蝶莫佩紫
羅囊細浥沾衣潤常披入室香東京袁世貴修
謹不如揚

其三

紛紛薄俗子棄擲莫爲隣過似聞家諱譚如延
大賓衣冠存古朴文字尚清新努力圖生事棄
時等棄身

其四

癡叔秋來健狂踪一寄聲拋書學走馬飲酒似
行兵素業慚先輩高文讓後生蒲騷猶未到眼
目已先明

其五

塞垣非腹裏念我客漁陽大將不生事邊人今

小康胡騎多北徙戎事畢秋防未忍言歸去令
公恕酒狂

其六

鄉物將來好雖輕路已賒衣單須大布酒渴仰
眞茶半世長爲客無宵不夢家懸知書到日綠
萼正敷花

其七

報道園林勝依然摩詰庄古梅如見雪新竹似
聞香石冷穿雲屐池虛泛月觴有山不用買何

故滯他鄉

其八

幸有春爲伴南歸樂事奢
十莖玳異草九錫寵名花
掃葉開吟徑磨苔出釣槎
游囊無長物一束爛雲霞

懊惱曲代友人賦

楊州夢覺到如今洛浦蕭條舊錦衾
流水高山難再遇止緣同調倍傷心

其二

青驄白馬渡江涯
劇藕晴絲滿碧沙
記得大堤十字曲
穿心一道過他家

其三

珠簾斜倚太輕盈
秋水梅花沁骨清
欲識泥人魂斷處
當場一曲似春鶯

其四

郎心不道折花枝
妾意寧同擲果姬
水裏戎鹽膠裏色
一班風味少人知

其五

今朝喜不上徘徊場自煮春茶自蒸香見說郎來
飛舞甚私將金串治壺觴

其六

江邊月底送金杯子夜紅氍浸綠苔嗔道與人
頻見促教他歸去我行來

其七

翻翻體態似驚鴻鸚鵡由來慧業同嘿嘿不言
能解意可憐心曲太玲瓏

其八

清言密室罷歌聲
郎頰粲花舊有名
酬得來機渾未易
看他譚笑似風生

其九

他家席上錯稱呼
心裏懷人碧作朱
聽說相如詞賦好
自誇眼內有明珠

其十

眼角纔逢逸興生
通宵不惜酒卮傾
竹林近日蕭條甚
粉黛叢中覓步兵

十一

自傷零落在歌樓桃葉閒悲團扇秋話到將來
歸結處清眸劒戟淚雙流

十二

欲隨蘇晉去逃禪浣却紅蓮種白蓮聞說城西
範大士與郎隨分送金錢

十三

懷人曾到小池臺絢履盈盈印綠苔穿過竹中
渾似燕一聲嬌笑帶香來

十四

醉餘花榮壓青鬟飲興風騷未易刪猶記西園
明月夜滿堦花影鹿胎班

十五

幾時嫁去事寧王易水聞言淚染裳富貴不來
蘇季子令他生拆繡鴛鴦

卽事

五畝家園晝揜扉不知何苦費心機悔爲抱葉
寒蟬計願逐啣蘆旅鴈歸柳浪湖邊波豔豔梅
花廊裏雪輝輝八行昨日傳家去早拭溪頭舊

釣磯

雨變詩戲作萬曆丁未夏京師霖雨不止
城中如江河官舍民居皆塌因賦

長安風俗近好奇不愛塵土愛漣漪但喜宅中
多貯水那聞牀下便穿池使君躡屐趨衾榻小
婦登牀送酒卮酒後耳熱仰天卧屋漏直滴口
邊髭浮牀忽如青雀舫謂是蔡姬蕩耶非未聞
滿朝拂衣去胡爲家家水上載西施莫是盡學
東平藉壞壁頽牆任闕窺釜中聞唼喁竈下聽

鼓吹廊成分宅今多見樓緩同餐誼更稀昨聞
張京兆寘妻八尺梯自上梯邊爲畫遠山眉又
見待詔金門狂李白長安市上醉淋漓天子呼
來不上船自稱臣今爲水師煙波釣徒張志和
不復泛家浮宅雪霽間只來銅駝陌上坐釣磯
謝安不造浮海裝海道近日在金閨天子有道
公卿賢胡爲乘桴學宣尼或云天子怒公卿罰
作階盾郎皆令立雨中不及侏儒有休時又云
歲星精是小兒上帝付與三天司命咨却來銀

瀟恣遊嬉雕雲屑雷檄龍命鴉引水作花溪致
令天河水奔潰茫茫陸地走蛟螭方朔是僊才
不宜如此痴又云箕子陳五行惟水一行天所
滋其餘四行可寘之水爲天淫氣多則爲禍基
披香女博士能免唾且嗤道路老人言臣心信
且疑近日上帝怒靈祇天地反日不相宜天公
不念地祇卑尊寵萍翳因地維致令四海橫流
五嶽夷地上蒼生皆爲魚地上諸蒼生俱是上
帝兒猛虎不噬兒天心豈不慈天若無地無所

承將令天軸亦下虧星斗燦燦沉海底一半皆
爲蛟龍齧小臣不勝哀再拜以陳詞日月是君
子萍翳小人資萍翳肆毒害日月不揚暉下土
昏昏無所見白晝沉黑陽光微萍翳柔而害物
破人室家圯人屋廬致令四海多浮屍犬不安
竇鷄不安埒所遭之處立殘破金石雖堅亦摧
危上帝信萍翳好惡毋乃歆雷霆本是上帝印
萍翳盜去市天威將來乞印不得印湯湯之水
入玉墀未央駘蕩無子遺臣願上帝逐萍翳信

日月收豐隆和地祇當令珠囊叶慶四海安覆
孟臣言猶如敗鼓皮願帝止輦收臣愚

題劉將軍壁上畫水歌

文

天明風靜氣微和澄江金斗熨纖羅有時商飈
微微發一漚纔起萬漚多清風徐來黃州水木
葉微脫洞庭波水雲魚鱗布天上天色波心相
蕩漾素練疊開流冷光桃笙乍展縈輕浪呷啜
遊魚應不驚鳬容鷗貌靜相向欣見澄清舊碧
流却挂將軍壁上頭誰將小李將軍手貌得吳

淞一段秋十年顏回悲塵滓對此漣漪堪洗耳
乞得葛疆弭州刀剪取瀟湘入袖裏

其二 武

千百年來盡活水道子以後無良工手摸疑有
隆隆蹟止與印板爭雌雄黃筌知微窮水變興
到疾走筆如風急湍洪濤滿天地怕見崩屋勢
涵涵此圖紗得古人意倒海排山盪碧空鯨吞
鯢怒如咫尺蕭然寘我滄海東吳國三千水犀
手射之不得空挂弓六月火雲掣飛電將軍對

此開華宴瞥然一見洗炎蒸不須更用龍皮扇
初春德州署中劉戶部元定席上

一見話青州登壇絕獻酬客從今夕至酒是去
年留白乳龍湫淨蒼官鳥道幽喜君微點綴隨
意有滄洲

其二

不作他人看深齋話夜分兒郎皆踴躍童僕也
歡欣素業存寒士青山憶冷雲撥煩名已著白
社漫邀君

小園卽事

滴瀝一園露帶露野花香買鵝爲鶴伴芟竹作
蘭牀恠石新移檻小舟初下塘漸干巾幘遠露
頂卧深簟

初秋

微涼宿陰林頓覺煩暑退登臺對清池過螢停
鶴背靜夜發嘯歌隣犬數聲吠

其二

臺上人正醉池中鶴正睡浩露漸深林鶴驚人

亦去

醉歸

水氣抱柴扉林陰夜凜冽風至如有人芭蕉一聲裂暗暗梅花廊殘月如凝雪

送胡叟東汀入蜀

少年意氣何軒舉誼重財輕如糞土指囷寄帑不足言口未開時心已許而今老來生事微故交已故新交稀蒼狗游雲同世態夜半扣門應者誰楚尾吳頭歸未得一帆又作江干別七十

五言集 卷之三
老人憐愛予不怕澀瀕堆邊雪一片熱腸我最
憐風塵少有如公賢他日西華來見我葛衣脫
去與純綿

步顧山人韻奉酌

十五春秋別清狂興宛然王維詩裏畫蘇晉酒
中禪老健羸高貴雄心長暮年一帆寒雪裏吹
笛過湘川

其二

父子爲臺向休嗟僮僕親縛綦尋石遍倚杖看

雲新癖盡惟餘醉技多豈救貧故園曾種樹千
尺長龍鱗

將發顧山人席上得清字同傳叔子

去住皆爲客明朝又遠征驚風花亂影怯月鴈
流聲不淺庾公興難澄叔子清今宵戒綺語相
對話無生

禮冷雲上人塔

班竹經廂在瘦楠佛像存襦猶溫木榻雲已冷
山根恠石常來牖寒潮自掃門淒涼禪友盡宿

草染啼痕

王龍嶼繡林江閣值雪雜詩

小樓枕石根波浪濺簷瓦遊客莫凭欄大江在其下

其三

濃寒輟校書晨酒宿顏面隱几不成眠靜聽水石戰

其三

皓然滿一洲洲畔千檣列不見舟中人但見舟

上雪

其四

賓從亦何喜
水石亦何怒
日暮絕來舟
江心雙白鷺

其五

以手掬江流
取之滌硯瓦
尊罍稍遠
窻莫被過帆打

其六

江光本自白
皎雪滿天地
江流本有聲
兼之猛

風至

曾長石太史以短歌三首見別步韻奉答
時予憂路梗回棹故未及之

魚甲浪中清馬蹄沙裏濁近稀予固達玄真一
生專以水爲樂不須窮渤流不用遍靈嶽近水
近山入眼來回視家園已握齷兼之高人玉屑
飛耳目都清那忍歸十日淹留謝眺宅此是浮
家第一適弟勸兄酬有餘歡君寧作主我寧客

其二

山水雖勝人兀兀安得方舟走吳越看君神骨
何輕清一泓寒泉流皎月馬頰羊羹等世路幾
人白首能如故知君愛我豈凡情松箭真堪保
歲暮持藤躡屐幾春秋剩水殘山非壯游惟憐
別我同心友獨立滄洲豈禁愁

其三

江籟常吹沙雪古一帆又指劉郎浦浪打冠巾
雨濺眉岍上相逢渾欲舞口言青女正愁人未
可輕舟離李姥

荆州有李姥浦

依舊登山山上樓猛風

吹浪帶山流波濤盜賊皆可懼人言愁時我始
愁且復斯須語已歸寧急去換却遠遊作近遊
當筵有曲還須顧石頭沙頭好放船盡把行裝
作酒錢子瞻漫道吾從衆米老而今不辯顛

沙市舟行

苦愛煙波好濃寒亦泛舟驚濤傾酒盞團雪上
貂裘聊博臨渦醉難爲拾石留閑悲陵谷變江
浪悉成洲

姚生舟中

君偉滕元發我閑張志和寒林攢渡口積雪貯
巖阿故着紅衫好直衝白鷺過算來人世樂誰
勝住煙波

除夕

如何將盡夜沙際尚維舟不是謝康樂定然許
遠遊村肴饒菜甲山火點松毬巧避城中事閑
忙得自由

其二

最厭俗誼譁枯清耐水涯夜燈分獵火年酒散

樵槎軟草依洲淨長松逐嶺斜僊源真是好隔
歲想桃花時予將遊桃源

澧陽晚泊

少入繁華路晚于疎澹宜水禽無俗夢巖石抱
幽姿浪繞蜂衙市風屯鳥爪枝四旬今已至獨
往莫遲遲

澧陽道中

崇竦存孤岫澄鮮異濁河松離天不遠石隔水
無多僧寺全依澗人家半住坡牛鳴寧幾里懸

愧到巘阿 去余里甚近

曉行

小舟穿澗曲，欹笠數諸峰。
曉霧江干柳，初曦巘際松。
石鋪如錦礫，水罩似輕容。
今之銀條紗類蕉簪千
山色纔開第一重。

早春鼎州梁山道中

擔風握月爲春忙，桐帽棕鞵野客裝。
山芋入盤存藥氣，松毛着火帶脂香。
纔離僧寺遮天樹，又見人家映水篁。
近日有文新誓墓，求同逸少問。

金堂

入德山同龍君超

芳屐隨春至鶯花伴寂寥臺基肇帝世

山有善卷臺

樹臘始唐朝嶺竹煙常暗溪梅雪未銷霏微昨夜雨若爲洗塵囂

其二

青鞋莫便去花片點山坡竹路都忘遠鶯聲不厭多得江還大叫選石忽狂歌處處堪雲臥空閒蘿薜阿

其三

桂老何知代鶯啼不計雙經行紅染屐晏坐綠
沉窻貪竹綠依路嫌松爲礙江山深田幾畝花
裏吹僊龙

其四

層巖開佛舍紆嶺閉禪關啼鳥金丸轉陳柯錦
石班高臺重覽矚遠水幾灣環誰作公超霧都
成米芾山

入桃花源四首步中郎韻

不是偕春至由來節序溫
修篁常引道姹草欲封門
水脉鳴千畝山嵐滴一村
未須愁夜色梅雪照黃昏

其二

寂寂聞啼鳥逢人或是僊
一丸堪塞路千嶂總圍田
浩露朝鋤月微風夜耨煙
過橋尋洞口夾道有花燃

其三

直捫煙蘿入石門半掩關
花深迷古洞泉墜響

空山獨往能輕骨長閒卽駐顏誰言僂路遠咫尺在人間

其四

尋源那肯止僂榻可能分白灑千層雪紅燒十里雲春儲魚子飯秋采女蘿裙誓不離丘壑羣真耳盡聞

附中郎入桃花源詩

溪雨濯雲根花林水氣溫睡鸞常守月僂犬欲遮門綠壁紅霞宅丹砂石髓村人中幾甲

子洞裏一黃昏

其二

白頭丫髻子花裏去如僊
鳥弄雲霞柵人耕
芝朮田庚年看紅藥生死在
蒼煙認着鑪香
去瞿童火尚然

其三

花石當雲關驛門臨水關
何年騎馬客踏斷
採芝山占井沈煙霧空潭洗面
顏丘陵一變
海一度到人間

其四

洞外一長揖人僊從此分看君如水影要我
以溪雲花氣熏幄戶霞光繞茜裙往來江海
上鸞鶴與相聞

僊蛻石

霞泐雲封幾萬年圓珠方壁媚澄川
清清之水鱗鱗石道是僊人好墓田

其二

如崩如綴又如拳骨理沉蒼色更妍
長爪王孫

無妄語幾回天上塋神僊

珂雪三前集卷之五終